

PREDGOVOR

Za izvođenje praktične nastave iz predmeta farmakologija i toksikologija, sem praktikuma iz farmakografije, na našem jeziku nema odgovarajućeg udžbenika. Zato sam za studente medicine napisao ovaj praktikum. U njemu sam, s obzirom na nedostatak udžbenika, dao opširniji uvod u neke zadatke. Praktikum sadrži više eksperimenata nego što će ih studenti izvoditi, ali će opis eksperimenata, nadam se, koristiti pri demonstraciji na vježbama ili predavanjima. Neke sam od njih adaptirao prema literaturi koju navodim, a ostale sam postavio na osnovu svog iskustva. U knjizi su i vježbe iz kliničke farmakologije koje se na Medicinskom fakultetu u Tuzli izvode u okviru posebnog predmeta.

Vjerujem da će ovaj Praktikum koristiti studentima i nastavnom osoblju u praktičnom radu, da će pomoći studentima medicine, stomatologije i farmacije da steknu osnovna znanja i vještine iz eksperimentalne farmakologije, toksikologije i terapije.

U procesu rada na usavršavanju laboratorijskih vježbi značajno su mi pomogla iskustva stečena u radu sa studentima medicine i stomatologije (jedanaest generacija), studentima Više medicinske škole (pet generacija) i studentima farmacije (dvije generacije) u Sarajevu, a posebno u radu sa tri generacije studenata medicine u Tuzli. Postdiplomski kursevi iz kliničke farmakologije, koje sam organizovao u Tuzli i Sarajevu, uticali su na razvoj ove farmakoterapijske discipline u našoj sredini u smislu spoznaje da ljekara – praktičara treba redovno upoznavati sa dostignućima iz ove oblasti.

Na kraju, želio bih da se zahvalim svojim recenzentima, prof. dr F. Erjavec i prof. dr O. Šćedrovu, koji su mi, pregledajući rukopis, dali korisne sugestije; zahvaljujem i osoblju Zavoda za farmakologiju i toksikologiju na tehničkoj pomoći pri izradi rukopisa.

Tuzla, 23. 12. 1980.

Prof. dr Rajko Igić